

Il Fegl ufficial cantunal svanescha el computer

Il project «fegl ufficial cantunal digital» s'avonza

DAD AUGUSTIN BEELI / ANR

■ **El preventiv cantunal ei l'informaziun publicada: Ina sligaziun cun interpresa generala hagi la consequenza ch'ei detti neginas investiziuns pil cantun. La cefra ella colonna dil fegl ufficial cantunal pigl onn 2015 ei vita. Tuttina sco il calender statal e la collecziun da leschas dil cantun Grischun duei uss era il fegl ufficial cantunal cumparer egl avegnir mo pli en fuorma electronica.** Dapi 200 onns cumpara el ella medema fuorma, numnadamein sin pupi. Il fegl ufficial cantunal ei in organ da publicaziun che vegn legius stedi. Igl ei in impurtont organ, quei malgrad che la materia ei pilpli schetga e formala. Impressaris san s'informar leu nua ch'ei san ir per lavur, crediturs nua ch'ei san ir per daners e catschadurs e pescadurs nua ch'els san reter las patentas. Il fegl ufficial cantunal cuntegn era las damondas da baghegiar per objects ordeifer la zona e publicaziuns dallas vischnauncas en connex cun projects e proceduras dalla planisaziun locala. La part cullas mutaziuns dil register cantunal da commerci miran biars per meraviglias. Seigi per meraviglias ni per interest professional: Igl organ vegn sfegliaus stedi nua ch'el ei. Tgi che consultescha buca quei fegl ufficial cantunal munchenta magari pintgas sensaziuns. El ei buca mo da leger ellas canzlias communalas e tiels ufficis cantunals. Era per fiduziaris eis ei in impurtont organ, el ei savens era sin meisa ella stanza da spetga da dentists, miedis e coiffeurs.



Il fegl ufficial cantunal sin pupi ei in organ che vegn legius e consultaus stediamein. Naven digl onn 2016 datti el mo pli electronicamein. FOTO A. BEELI

Il cussegl grond ei informa

Duront 150 onns ha la firma Casanova ediu quei organ cantunal culla cuviarta alva e las sdremas blauas e la grischa. Dapi rodund treis onns exequescha la casa editura Samedia quell'incarica. Pil mument cumpara la versiun sin pupi mintg'jamna en ina ediziun da 7100 exemplars. La midada ei succedida sin

fundament dalla lescha da submissiun. Tenor quella ein tuttas lavurs pil maun public suttamessas alla libra concorrenza aschia che tuttas firmas che adempleschan las cundiziuns san inoltrar lur offerta.

Dalla midada da Casanova tier Samedia ha la clientella s'encurschiu pauc ed era buca s'empatschau dils svaris davos las

culissas. Principal ei ch'igl organ ei cumpariu vinavon mintga gievgia sco adina. Oz gievgia cumpara il numer 22 e la cefra da paginas cumparidas uonn s'augmenta sin circa 1700. Tochen la fin digl onn pudess la cefra survargar il cunfin da 4000. Pil cantun ei il fegl ufficial cantunal ina fontauna d'entradas. Che quei vegn a semidar aunc uonn conferma il vice-canceller cantunal *Walter Frizzoni* sin damonda dall'anr. El gi: «Il cussegl grond ha gia priu notizia dil fatg ch'il fegl ufficial cantunal vegn digitalisau. Leu ei quei era vegniu communicau.» El vul gir cun quei ch'igl ei buc in fatg zuppau ch'il fegl ufficial ella fuorma usitada vegn remplazzau. «En tgei fuorma che quei schabegia vegn la publicitad ad endrietscher per il november.» Dapli sa e vul el buca gir, pertgei igl ei caussa dallas contractivas denter la casa editura Samedia ed il cantun. Il fatg ch'ei dat ina midada conferma era la casa editura che producescha ed administrescha il fegl ufficial cantunal. A tgi che emposta actualme in abbonament communichescha la Samedia ch'ei seigi en vesta ina restructuraziun da quei product. Basta ch'ins retscheivi il carnet.

Mintg'onn dameins paginas e dapli visetas

Naven digl onn 2016 san ins probabel buca pli sfegliar en quei carnet, pertgei la nova fuorma vegn ad esser la digitala. *Walter Frizzoni* conferma che la restructuraziun mondi ella medema direcziun sco il calender statatal e la collecziun dallas leschas cantunals. Quella collecziun cumpara dapi onns buca pli sin pupi, quei che levgiescha la lavur a canzlias, ad-

vocats e fiduziaris d'actualisar e midar ora fegls ellas mappas da leschas. Era il calender edescha la canzlia cantunala mo pli en fuorma electronic-digitala silla pagina d'internet.

Tgei gudogn ch'il cantun fa mintg'onn ord la concessiun dil fegl ufficial cantunal ei buca transparent. In bien gudogn eis ei en tutta cass. El quen statal publichescha la canzlia cantunala sco responsabla pigl organ neginas cefras en francs e raps, mo-bein sulettamein il diember da paginas producidas. Ils onns 2011 han ins aschia stampau 4720 paginas, el 2012 4496 paginas ed el 2013 ina cefra da 4032. Igl onn vargau 2014 indichescha il quen statal ina cefra da 3922 paginas.

Ella medema tabella san ins leger las cefras dallas visetas silla plattafuorma digitala. Igl onn vargau 2014 han ins cliccau 3344783 gadas sin ina pagina d'internet dil cantun. Las cefras da milliuns egl internet ein s'augmentadas cuntuadamein onn per onn, viceversa ei la cefra da mellis sin pupi sereudicidas. Sias publicaziuns, annunzias e comunicaziuns vegn il cantun pia a far el futur ella fuorma electronica. Vischnauncas, ufficis e privats vegnan a saver abbonar mo pli la versiun electronica. Naven digl onn proxim svanescha il carnet tipic el format A5 ed ins sa clamargiu mintga gievgia las informaziuns dil fegl ufficial cantunal dil telefonin ni dil finistrel electronic. Aunc uss ei denton nuot cunvegniu e decidu ufficialme in. Las duas partenarias dil contract, pia la casa editura Samedia e la regenza, vegnan a comunicar il november ils detagls da quei contract niev e quella fuorma da publicaziun nova.

NOS LECTURS RAPPORTAN

La Pro Val Sumvitg di na al Parc Naziunal Adula

Dacuort ha l'unioni Pro Val Sumvitg salvau sia radunonza generala a Surrein ell'ustria dalla Greina. La Pro Val Sumvitg (PVS) ei vegnida fundada ils 1980 per far frunt a plans da baghegiar ina piazza d'armas en Val Sumvitg.

Amaturs dalla Val ein stai ensemen da lezzas uras culla finamira da mantener sias valurs naturalas e culturalas era pils vegnentsuenter. Quella finamira ei tochen oz lu era reussida, buc il davos grazia alla lavur endinada dils treis emprems presidents che ein era stai denter ils tschun iniziants da quella uniu. Dapi trentatschun onns organischescha la PVS lu era mintg'onn lavur cumina, clamond ensemen ses commembers per mantener trutgs, mundar pastiras, far seivs, mantener feclers, sco era per exempel ina calgera ni auters indrezs da muntada culturala che fussen schiglioc i en decadenza e vegni emblidai. Ils cuosts per material vegnan pil pli cuvretgs cullas contribuziuns dils commembers. La lavur vegn fatga gratuitamein, sco quei ei tier idealists.

Fatschentas ordinarias

Las fatschentas ordinarias ein sesplegadas spertamein sut la bitgetta dil premurau president *Meinrad Bearth*. *Sigis Schmed* ha abdicau sco actuar ed en siu post ei *Felix Flepp* ruchegeiaus. La cassiera *Assunta* ha saviu mussar si in bi quen final. Ad els tuts seigi engraziu per lur buna lavur che secapescha buca da sesez.

La radunonza ha decidu da dar 2000 francs per material per mantener las seivs caracteristicas sur e sut via da Portas tochen dadens Val. 3000 francs eran gia vegni concedi dalla vischnaunca ord la donaziun Greina. La lavur vegn organisada e fatga primavera proxima dalla PVS.

Discussiuns animadas arisguard il Parc Naziunal Adula

Silsuenter han ils commembers priu posiziun arisguard il Parc Naziunal Adula. Discussiuns animadas havevan gia giu liug magari a caschun da lavurs cuminas. La suprastonza ha anflau per bien dad envidar alla radunonza *Rico Tuor* per informar sur dil parc naziunal e per dar risposta a detagls che tucassan la Val Sumvitg e la Greina. Certs commembers ein seiventai si empau ch'ins envidi en in dil parc. Essend ch'ins survegn gie gia dapi onns buc informaziuns novas ni schizun detagliadas fetschi quei

buca grond senn. Nus essan lu facticamein era buca vegni sissu enzatgei niev. Memia detagliu sappien ins era buca reglamentar aschia in parc, manegia *Rico Tuor* ed insumma decidi la vischnaunca, quei vul dir nus, sur da camonds e scamonds. Quei secapescha negin che ha cartiu. Interessau il publicum havessen era las rutas exactas per ascender ils cuolms e tgeinins che astgan vegnir ascendi e tgeinins buca. Mo era cheu ein las respostas buca stadas propi carteivlas. Il principal ei per *Rico Tuor* che las vischnauncas votien inagada gie. Sche Sumvitg voti per exempel na, ve-

gni in center dil parc cun kiosk etc. secapescha buc a vegnir sin siu territori.


Sco ils professers serimnai dacuort en Lumnezia pervia dil parc ei era la Pro Val Sumvitg dil meini che la damonda «parc gie?» ni «parc na?» seigi fallida. La Val Sumvitg e la Greina seigien gie schon in parc, e leutier in che funcziuni senza scamonds, numnadamein pervia dils merets da nossas vischnauncas e buc il davos pervia dallas stentas dalla Pro Val Sumvitg e quei senza dar ora 5,5 milliuns per in project cun daners da taglia, sco il project Adula ha fatg quei tochen oz.

Gronds problems vegnan la Val Sumvitg e la vischnaunca senza dubi a survignir cun animals da rapina sch'in parc naziunal vegn realisau. En in tal ei ina reducziun da lufs ni uors tabu. Cheu vegn ualves la vischnaunca a saver decider. Era vegnan quels animals buc a setener vid cunfins fatgs da birocrats e star pulits ella zona da coc.

Las vischnauncas sperdissen

Il sulet segir ei che las vischnauncas da Sumvitg e Vrin sperdissen cun dir gie ad in Parc Adula las contribuziuns ch'ellas survegnan muort haver desistiu sin in lag da fermada ella Greina. Quei ei tuttina per Sumvitg 666000 francs ad onn e per Vrin eis ei circa la medema summa. Quei contract che cuoz aunc vegn onns porta tochen il davos ca. 27 milliuns allas vischnauncas da Sumvitg e Vrin. Inagada che nus vein schenghegiu il territori alla confederaziun van quellas intradas alla fin. Sche las vischnauncas Sumvitg e Vrin dian denton na ad in parc naziunal han ellas vinavon enta maun las hartas e san puspei entscheiver a contrahar cun las instituziuns dalla natira cu il contract croda. La damonda ei pia buca parc ni buca parc, la damonda ei: Lein nus mantener vinavon la pusseivladad da survegnir egl avegnir contribuziuns perquei che nus mantenin ina cuntrada, ni lein far ils schulis e schenghegiar nossas bellezias alla confederaziun per bials plaids avon la votaziun e per scamonds suenter la votaziun?

La Pro Val Sumvitg ha cheu in meini clar e di cun gronda maioritad in decisiv NA ad in Parc Naziunal Adula. Segiramein vegnan era ils vischins buc a schar menar davos la cazzola dalla massiva propaganda e dallas splendidas brochuras.



La Pro Val Sumvitg s'engascha per il manteniment dalla Val.

MAD

Leo Tuor